



Komunikadu imprensa

Períodu: Dezembru 2011

Edisaun: 15 Dezembru 2011

Parlamentu Nasionál aprova Bilaun U\$ 1.674.130 ba OJE 2012 JSMP rekomenda Governu tenki asegura ezekusaun ba Fundus Impréstimu

Parlamentu Nasionál iha loron 25 fulan Novembru tinan 2011 finalmente aprova ona Orsamentu Jerál Estadu (OJE) ba tinan 2012 ho montante bilaun U\$ 1.674.130. Aprovasaun ne'e hala'o ho votus afávor 39, kontra 20 no absteinsaun 1.

Orsamentu Jerál Estadu ba tinan fiskal 2012 úniku, tanbá aleinde foti husi fundus Petroliferu no Fundus Doméstika, ba primeira-ves Governu Timór Léste impresta tan milaun U\$ 43.100.000 husi fundus impréstimu ne'ebé sei foti husi Banku Mundiál ka IRDB homós nasaun avansadu sira.

Fundus impréstimu milaun U\$43.100.000 sei ezekuta ba konstrusaun infra-estruturas estratejikas país nian, ne'ebé previstu ona iha Planu Estratéjiku Dezenvolvimentu (PED) ne'ebé kompostu husi konstrusaun ho supervizaun ba ligasaun rodoviáriu ka estrada entre Dili-Manatuto-Baucau, Manatuto-Natarbora, Dili-Liquisa-Tibar-Ermera no Maubisse-Ainaro-Same.

Aleinde ne'e preve mós konstrusaun ho supervizaun Auto-Estrada Costa Sul hodi tulun dezenvolvimentu *supply base* ba konstrusaun esplorasau mina Tasi Timór inklui konstrusaun ho supervizaun dezenvolvimentu sistema drainajen Dili nian ne'ebé sei rezulta sidade ne'ebé moos ho hamenus inundasaun. Polítika ne'e, tuir Primeíru Ministru Xanana Gusmão atu prómove dezenvolvimentu rurál, industria ho turismu no loke asesu ba merkadus inklui mós atu hadia saneamentu báziku ho sistema drainajen to'o 2015.

Diretór JSMP Luis de Oliveira Sampaio *haktuir katak JSMP apresia teb-tebes esforsu hot-hotu ne'ebé IV Governu Konstitusionál halo atu dezemvolve povu no nasaun nia futuru.*

Mesmu nune'e, JSMP ejije ba orgaun soberania tomak liu-liu ba Parlamentu Nasionál atu ezerse nia poder fiskalizador atu fiskaliza ezekusaun orsamentu ne'e ho efetivu no atu asegura katak utilizaun ba fundus impréstimu sei atinzi duni planu ne'ebé estadu preve ona.

JSMP preokupa tanbá, realidade hatudu momós katak apoiu husi Banku Mundiál dala barak halo nasaun frazil ho nasaun pre-dezenvolvidu sira monu no sai mukit liu tan tanbá faila atu ezekuta fundus impréstimu ho efisiente. Liu-liu, tanbá nasaun sira ne'e foin sai husi konfliktu no la iha kuadru sistema báziku ne'ebé seguru atu maneija fundu ne'e iha maneira ne'ebé transparente,

akontavel no ba nesesidade ne'ebé apropiadu. Ezemplu Indonezia iha tinan 1997 no agora Africa, Portugal ho Mexico.¹ Tanbá ne'e mós mak, liu-liu, JSMP ejize atu asegura katak fundu impréstimu ne'e la bele benefisia ka favorese deit ba grupu kiik oan balun, tanbá sistema no kulturu administrasaun funsaun públiku ne'ebé sei frazil teb-tebes.

Nasaun hirak ne'e ikus mai tenki sofre no tenki selu tusan tokon ba tokon durante tempu naruk, tanbá la iha jestaun ne'ebé adekuaudu inklui la iha preparasaun institusionál, ne'ebé forte antes atu impresta fundu ne'e, no ikus governu nu'udar ajensia implementadór ba fundus impréstimu faila ezekuta no la fó benefisiu ba povu.

JSMP rekóñese katák, haree husi aspeitu globál realmente apóiu husi Banku Mundiál iha duni aspeitu pozitivu tanbá bele ajuda nasaun kiak no nasaun pre-dezenvolidu sira bele desenvolve sira nia ekónia ho selu funan ne'ebé ki'ik. Maibé nia kestaun mak, dala barak apóiu hirak ne'e, kria fali risku ka dezastre ba povu tanbá maiória nasaun hirak ne'ebé halo impréstimu mai husi nasaun ne'ebé foin hahu establese sira nia sistema no iha tempu hanesan sistema hirak ne'e frazil no fasil atu manipula. Realidade ne'e mós mak agora-dadaun Estadu Timór Léste infrenta hela.

Dalabarak liu, apoiu husi Banku Mundial no Agencia Fundu Imprestismu Global sira, la'os sai rekursu produtivu ba nasaun imprestismu sira, maibe pela-kontrariu bele sai fali realidade ne'ebé kontra-proditivu nomós hatu'ur estadu imprestismu sira iha interes organizaun fundu mundial sira ne'e nian.

Relasiona ho preokupasaun hirak ne'e, JSMP husi orgaun estadu competente tomak atu, tau konsiderasaun maka'as ba prosedimentu fundus impréstimu ne'ebé tuir intervensaun Primeíru Ministru Kay Rala Xanana Gusmão katak fundus ne'e sei jere direktamente husi nasaun doadores sira no Timór Léste simu deit rezultadu.

Mesmu nune'e, JSMP harê katák situasaun ne'e fó espasu bo'ot ba doadores sira atu manipula no aproveita benifisiu ne'e hodi apoia sira nia interese.

Tanbá ne'e, JSMP ejize ba governu atu utiliza didiak fundus ne'e hodi la hamonu estadu ba rai ku'ak hanesan nasaun sira seluk.

Atu hetan infórmasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883

¹ <http://chiez.blogstudent.mb.ipb.ac.id> impaktu pozitivu no negative husi papel banku mundial ba mundu internasional no Indonezia (*dampak positif negative dari peran bank dunia terhadap dunia internasional dan Indonesia*)